

AKASHVANI AIZAWL
REGIONAL NEWS BULLETIN

HEADLINES (EVENING)

- 1. India leh Pakistan inkar boruak a chhiat avanga Bangladesh ramri khar chuan Mizoram sorkar sawhthing hralh chhuah a nghawng mek.
- 2. International Nurses Day chu vawiin khan Civil Hospital, Aizawl Conference Hall-ah lawm a ni.
- 3. Congress MLA Pu C. Ngunlianchung a chuan a thubuai-ah anticipatory bail lak a tum loh thu leh, tan a inhuam thu a sawi.
- 4. India leh Pakistan indo avanga ramchhunga thlawhna tumhmun khar lailawk 32-te chu hawn an ni leh tawh.

<><><>

GINGER MARKET

India leh Pakistan inkar boruak a chhiat avanga Bangladesh ramri khar chuan Mizoram sorkar sawhthing hralh chhuah a nghawng mek.

Akashvani Aizawl zawhna chhangin, Mizoram atanga sawhthing thawhchhuah lam buaipuitu, Starfarm CEO Pi Malsawmi chuan Bangladesh chu India atanga sawhthing leichhawngtu lian ber a ni tih a sawi a. India leh Pakistan inkar boruak a chhiat avanga Bangladesh-in ramri a khar nghal avangin India ram chhung hmun hrang hranga sawhthing thar chhuah an chhekkhawl sa te chu a inhnawhkhawm vek a, hei hian Mizoram atangin ram chhung khawpui lian hrang hrangah te sawhthing an hralh theih loh phah niin a sawi a, India leh Bangladesh ramri khar hnu-ah sawhthing man a tlahniam char char tih sawiin, tun dinhmunah Delhi Mandi-ah chuan sawhthing kg 1-ah cheng 28 vel a ni mek a, Mizoramin a hralhna Silchar leh Siliguri-ah te chuan kg-ah 17 velah a tlahniam tawh niin a sawi.

Pi Malsawmi chuan ram chhunga sawhthing man tlahniam ta lutuk chu Mizorama pawhin a tuar nasa chho zel ni a a hriat thu sawiin, loneitute leh Mizoram sorkar support price thlengin a nghawng vek a ti a, Kumin February ni 20 atanga Mizoram sorkar sawhthing lei thawh khatnaa sawhthing te chu hralh zawh loh tlem te chauh a awm tawh a, hetih lai hian April ni 21 atanga sawhthing lei thawh hnihna erawh chu ruahsur vang leh India leh Pakistan indo avanga ramri khar avangin thawh chhuah lamah harsatna an tawh chho

mek a, Mizoram sorkarin secondary collection centre (SCC) a siam a sawhthing chhekkhawl te tihral chu a harsat a rin thu a sawi bawk a ni.

Police hotute hnen atanga Akashvani Aizawl thu dawn danin tun hnai khan Mizoram Police hotute leh he ta paramilitary force, central armed police force (CAPF) leh intelligence pawl aiawhte chu Aizawlah an inhmukhawm a. Kilometre 318 a thui Mizoram leh Bangladesh ram inrina vengtu Border Security Force (BSF)-te chu ramri ven kawngah uluk leh khauh leh zuala thawk tura hriattir an ni. Pakistan hian Bangladesh a firfiak pawlte hmang tangkai-in India ram tihbuai a tum ni a thudawn a nih avangin Bangladesh ramri-ah hian venhimna khauh zawka kalpui ni se tih a ni a, chutiang a hmala tur chuan BSF te hrilh an ni.

Hemi hma hian intelligence pawlte leh venghimtu sipaite chu Bangladesh nena ramri-a venhimna ngawrh zawka kalpui tura hriattir an lo ni tawh a. Meghalaya sorkar phei chuan ramri hrulah hian zan curfew a puang mek a. Pakistan enthlatu pawl ISI mite leh Pakistan sipai officer engemawzat Bangladesh a tirhluh an nih avang leh Bangladesh sorkar hawiher enin venhimna hi khauh zawka kalpui a ni.

<><><>

POWER DISRUPTION

Nimin tlai, zan leh tukin zing lama ruah sur avangin Aizawl khawpui hmun hrang hrangah kawlphehta pek chhuah a khaihlak nasa hle.

Power & electricity department thuneitute hnen atanga thu dawn danin ruahsur leh thli tleh avangin electric ban flu leh a bana kangmei chhuak report an dawng nual a. Veng hrang hrang engemawzatah kawlphehta pek theih a ni lova, ruahsur a ban deuh lai-in thawk mah se, a sur chhunzawm zel avangin hna thawh harsa an tih thu an sawi. Hmun thenkhatah thin flu leh thingzar tliakin electric sem chhuahna hrui a vuak chhiat avangin harsatna an tawk bawk a. Tun dinhmunah a chhe nasa zual tih loh chu an siamtha chho zel niin an sawi a. Transformer chhia pawh engemawzat a awm ni a thudawn a ni.

Ruah tui avangin electric ban engemawzat-ah electric current a kal a, chu chuan harsatna a siam nual niin an sawi bawk a ni

<><><>

INTERNATIONAL NURSES DAY

International Nurses Day chu vawiin khan Civil Hospital, Aizawl Conference Hall-ah lawm a ni.

Vawiina International Nurses Day lawmnaah hian khuallian Pi Lalchhanhimi, Joint Director of Nursing chuan thusawiin, Nurse te chuan damdawi lama inenkawlina kawngah hmun laili leh pawimawh tak an luah an ni a ti a. Nurse-te leh nurse zir mekte chuan theihtawpa an inpek a, Pathianin hmangaihna a pek leh tuarchhelna leh mahni inphat chungah hna an thawh chuan vawiina an thupui-‘Our future, caring for nurses strengthen economics’ chu a hlawhtling ang a, ram sum leh pai dinhmun tisangtu pawh an nih ngei a rin thu leh, hei hian damlo te an enkawlina kawngah leh hriselna kawngah rah chhuah tha tak a neih ngei a rin thu a sawi a, khawtlang leh ram sum leh pai

dinhmun a that zel theih na’n nurse te chuan dinhmun pawimawh tak an chang tih a sawi bawk a ni.

Hei bakah hian Khuallian Pi Chhanhimi chuan tun dinhmunah Mizoramah registered Nurse sang 5,500 chuang an awm tih sawiin, Mizoram atangin India ram pawna nurse hnathawk mi 111 an awm mek a, ram chhung hmun dangah 760 chuang an awm mek bawk niin a sawi a. Hmun danga nurse hna thawkte’n Mizoram tan sum leh pai an thawhchhuah chuan Mizoram tam investment nasa tak a siamsak a ni a ti.

Mizoram pawn atanga nurse hnathawk tura rawn lut an awm lo chu Mizo nurse te intodelh zia lantirtu niin a sawi bawk a. Mizoramin tun aia nurse tam zawk a neih theih na’n leh Mizoram pawna thawn chhuah tlak nurse tam tak an awm theih na’n Directorate of Nursing chuan theihtawp a chhuah mek a ni a ti a. Nurse zir theihna tur Auxiliary Nurse and Midwife, ANM school 4 leh General Nursing and Midwifery, GNM school 4 bakah 2 hawn thar leh tur an nei mek a, tun dinhmunah Serchhip leh Siaha-ah GNM school hawng turin hma an la mek tih a sawi bawk a ni.

Vawiina International Nurses Day lawmnaah hian Civil Hospital Nursing Superintendent, Pi Lalrintluangi chuan -‘Our future, caring for nurses strengthen economics’ tih thupui hmangin thu a sawi a, Senior Nursing officer Pi Lalengzami Pachuau kaihhruaina in nurse te thutiam an sawi rual bawk.

<><><>

FIR

Khawzawl khawpui atana lui tui a chhuk zawnga tuilakna tuidawt chhu chhia a tui lo la rute lakah PHE Department chuan Khawzawl Police Station-ah FIR an thehlut dawn.

Thla hlui ni 18 a chhe tawh Khawzawl khawpui chawmtu Greater Khawzawl Water Supply Scheme a tui pump khawl chhia chu siamthat a la ni lova. Hetihlai hian Khawzawl chhak tlang atanga lui luang hmanga tuilakna dawt lo chhu chhia a tui lo la rute lakah FIR an thehlut dawn niin PHE department hotute’n an sawi. PHE WATSAN Division, Khawzawl chuan thuchhuah siamin GKWSS tui pump khawl chhia hi Guwahati Workshop-ah siamthat tumin buaipui mek a nih thu an sawi a. Tun dinnmunah tlang sang lam lui luang thla tui lakte chauh sem theih a nih thu leh he tianga tui lakna dawt chhu chhia a, mahni huan leh lova pawt ru engemawzat an awm tih sawiin hei hian tui sem chhuah tur a tih khaihlak phah fo a ni an ti a. Hei hi thil awm dan a nih avangin he’ng mite lakah hian naktuk Thawhlejni-ah FIR thehluh an tum tih an sawi a ni.

Khawzawlah hian chhungkaw tamtakin tui an lei tawh a. Tunhnaia ruah tla avangin tlang atanga luang thla luite hmanga tuilakna-ah te tui a haw leh theih tawh avangin a theih angin veng hrang hrangah a inchhawkin tui sem chhuah a ni a. Chhungkaw khatah litre 2,000 zelin an sem rual a ni.

<><><>

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



CONGRESS MLA

Congress MLA neih chhun Lawngtlai West bialtu Pu C. Ngunlianchunga chuan Lawngtlai helna tur kawngpui sial chungchanga sum eiru-a puh a nihna-ah bail lak lawk a tum loh thu a sawi.

Vawiina Trained Nurses Association of India, Lawngtlai District Branch-in International Nurses Day an lawmna a khuallian, Pu C. Ngunlianchunga chuan he thubuai-ah hian bail lak lawk a tum loh thu sawi-in a tul chuan lungina tan a inhuam thu a sawi a ni. Lawngtlai khawpui helna tur kawngpui siam chungchangah hian thil fel lo a awm ni a hriat chungchangah he hna buaipui tanlaiin LADC a chief executive member (CEM) a nih lai a nih thu a sawi a. A thubuai chu sorkar in court rorelna lam ah ngaihtuah a remti tih sawiin, a thubuai neih chu eirukna, hlemhletna lam a ni lo niin a sawi thung. Ram neitute tlawmngai tura a ngen thu leh a hnu lamah he Project hi a puitling lo zui nen thuneihna hmang suaala puh a nih thu a sawi a. Assembly House a a lo sawi tawh angin, eirukna a ni emaw, thuneihna hman suaalna ah pawh inhnamhnawihna a neih a hriatloh thu sawiin bail lak lawk a tum loh thu a sawi a ni.

Pu C. Ngunlianchunga thubuai hi Anti Corruption Bureau (ACB) chuan chhui zovin court-a a chungchang ngaihtuah a nih theih na'n sorkarah phalna 'prosecution sanction' an dil a. Chu dilna chu pawmin larsap chuan court-a ngaihtuah phalna hi a pe a. Hei hi LADC CEM a nih lai a puhmawhna a nih avangin district council & minority affairs department chuan April ni 29 khan prosecution sanction pekna thupek hi larsap aiawhin a tichhuak a ni. Pu C. Ngunlianchunga thubuai chhuitu ACB chuan IPC section 120B/409/34 leh Prevention of Corruption Act, 1988 section 13 (1)(a)(b) leh 13 (2) tlawhchhanin thubuai hi an ziaklut a ni.

Pu C.Ngunlianchunga chuan LADC a sorkar a kal mumal theilo leh sorkar din na'na thil kalpui dan chu hnam tan mualphona a ni a ti a. Sorkar nghialnghet a awmtheih na'n Anti Defection law neih chu thil pawimawh tak a nih rualin, duh duha neih mai theih a ni lova, he dan hi neitura beih a tul a tih thu a sawi a ni.



India leh Pakistan indo avanga ramchhunga thlawhna tumhmun khar lailawk 32-te chu inkahhai puan a nih hnuah hawn an ni leh tawh a, heng tumhmunte hi tun thla 15 atang khan civil mite tan khar a ni.

Airports Authority of India chuan passenger-te chu Airlines website atangin an thlawh hun tur te, thuthar a awm leh awm lohte en thin turin a chah a ni.

<><><>

MEDIA BRIEFING BY AIR MARSHAL AK BHARTI

Director General Air Operations (DGAO), Air Marshal AK Bharti-a’n India-in a beih chu Pakistan sipaite nilovin mifirfiakte leh an hmunhma pawimawhte a ni, a ti a, he a beihnaa Pakistan sipaite lo inrawlh a, mifirfiakte an pui chu pawl a tih thu sawiin India sipaite tan chuan chhan let loh theih a ni lo, a ti.

Vawiin New Delhi-a Operation Sindoor chungchanga thuthar lakhawmtute a kawmnaah Air Marshal Bharti-a chuan Operation Sindoor thlak anih chhunga ramchhung civil mite leh sipai hmun pawimawhte tawrhna a thlen loh nana India sipaite chet dan, chipchiar takin a sawi a, Pakistan-in drone leh aerial vehicle rual tam tak a rawn kahchhuahte chu India siam UAS system hmangin a bik taka train Indian Air Defence mi-ten an lo dang zel a ni, a ti a, Pakistan-in China siam PL-15 missile chuan a tum a thelh thu pawh sawiin India erawh chuan a tum tak, Nur Khan airbase leh Rahim Yar Khan airbase-te a kapchhia a ni, a ti.

DGMO chuan BSF thlawpna leh puihna an dawng tha chu lawmawm a tih thu pawh sawiin Operation Sindoor hnuaiah hian sipai chi thumte chu inrem takin an thawkho tlat a ni, a ti a, he beihpui hi sorkar, department leh agency hrang hrangte bakah ram mipui vbch 140-ten an zawng zawngin an thlawp tlat a ni, a ti bawk.

<><><>